

sont et chi à venir sont; che tot les mercheans et tot les homes Venetiens chi sont outremer e deça e veneront en nostre terre, seront sanz pene e sens doute de nos et de touz les nos en tous leus out ils seront et out che il sont, sos nostre roiuaté, de leur persones et de toutes leur choses, alant et demorant et retornant, vendant et achetant, sans rien doner, i auront franchise en pors, en cittés, en pons et en yssues de tous leus; sauf les Venetiens che demorans sont deça mer, se il passent par la Portele, che il soient tenus de paier droiture si cum est usage dou leuc. — Mais tous les Venetiens chi porteront or et argent, et vodront coygnier besanz ou monee, si donront la droiture, si cum ceaus chi a Acre donent droiture de besanz ou de monee. E se l'or ou l'argent ne se coigne besanz ou monoye, ne donront<sup>1</sup>, nulle droiture.

E se vassiau de Veneze brise en toute nostre terre, en rive de mer ou en mer, tot quant che sera delivré de la mer, soit home, vassiau ou autre chose, toute sera sanz doute e sanz penser de nos e de nos subjés<sup>2</sup>. E se home de autre nation ne autre chose, seront au vassiau chi brisera, si demorront à nostre comandement avec le leur. Et les venetiens vassiau ne autre chose d'home d'autre nation ne prendront en leur garde ou delivreront come le leur. Et se autre manière de vassiau brise, en che y soit Venetiens, li Venetien soit franz et sans pene, luy e toutes ses choses lesqueles il provera che soient soues; e le vassiau e les homes d'autre nation demourront au nostre comandement avec le leur. — E se auchun de Venetiens voudra passer per nos [terres], en terre de Crestiens ou de Sarasinz, out nos aions pais et serement, il peut aler et revenir, luy et tote sa mercheandise sanz arestament. Et se aucun damage avient à celuy Venetien, chi ira, nos penerons et en tel manière procurerons, cum de la nostre chose a recovre. — Et se il avient, che Venetien muire en nostre terre, e voudra des soues choses fair testament, e che Venetiens sont au leuc et [voudra] mettre en la main de Venetiens o d'autre, cel testament receu sera e droit. E se il avient che il moire sens testament, e che Venetiens soit au leuc, les choses dou mort demoreront en la main de celuy Venetien. E se Venetiens

1 devront.

2 subiens.